

Visoki predstavnik nastavlja proces ukidanja zabrana za smijenjene osobe

Visoki predstavnik je danas objavio da ukida zabranu za tri osobe koje su smijenjene u junu 2004. godine zbog ometanja saradnje sa Haškim tribunalom. Navedene osobe su Goran Popović, Željko Jungić i Svetozar Radulović. Visoki predstavnik je naglasio da je ovo dio stalnog procesa revizije odluka o smjeni slučaj po slučaj, a proces je otpočeo u martu 2005. godine. To znači da ukoliko se neka osoba promijenila ili su se promijenile okolnosti te OHR i međunarodna zajednica mogu zaključiti da ta osoba više ne predstavlja smetnju mirovnom procesu, osoba može ponovo učestvovati u javnom životu. Donesene odluke su utemeljene na osnovu političke procjene i ne utiču na otpočete zakonske procese u koje mogu biti uključene te osobe.

Visoki predstavnik je konstatirao da su vlasti Republike Srpske postigle značajan napredak tokom 2005. godine, posebno nakon što je u februaru uspostavljena Grupa za praćenje saradnje sa Haškim tribunalom kojom su kopredsjedavali visoki predstavnik i premijer Terzić. Imajući u vidu te činjenice visoki predstavnik je zaključio da treba priznati napredak te ohrabriti dalji napredak ukidanjem odluka koje se tiču ranije smijenjenih osoba. U donošenju ovih odluka koje se tiču ovih osoba visoki predstavnik se pomno konsultirao sa Haškim tribunalom i drugim relevantnim međunarodnim organizacijama.

Ali visoki predstavnik je takođe konstatirao da saradnja sa Haškim tribunalom neće biti završena sve dok svi haški optuženici ne budu u Hagu, a to se naročito odnosi na Ratka Mladića i Radovana Karadžića.

Smjena nekooperativnih zvaničnika sa javnih funkcija je bila

(i jeste) izvanredna mjera koja je bila neophodna da bi se eliminirale glavne političke i institucionalne prepreke implementaciji mira.

Poništavanje odluka o smjeni ne osporava važenje prvobitne Odluke ali napredak postignut u BiH znači da je i moguće i neophodno razmotriti postepeno ukidanje nekih odluka o smjeni.